

Na osnovu Člana 38. Statuta Sportskog saveza Grada Mostara, Upravni odbor Saveza na sjednici održanoj 22.07. 2010. godine, donosi :

**PRAVILNIK
O SUFINANCIRANJU SPORTSKIH
MANIFESTACIJA U GRADU MOSTARU**

Član 1.

Ovim Pravilnikom utvrđuju se uvjeti, postupak i dodatni kriteriji za sufinansiranje međunarodnih, regionalnih, nacionalnih i lokalnih sportskih takmičenja u Gradu Mostaru, osim međunarodnih višesportskih takmičenja koja su u nadležnosti Olimpijskog komiteta BiH, a organiziraju se u Bosni i Hercegovini, te je njihovo financiranje utvrđeno posebnim projektom odnosno programom i budžetom OK BiH.

Član 2.

Odredbe ovog Pravilnika odnose se na organiziranje, svjetskih i europskih kupova, službenih međunarodnih takmičenja, međunarodnih turnira, regionalnih turnira, te drugih značajnih takmičenja koje organiziraju mostarski klubovi i nacionalni sportski savezi koji su članovi OK BIH, za takmičenja utvrđena kalendarom takmičenja nadležnih međunarodnih sportskih federacija.

Član 3.

U svrhu podrške organizaciji sportskih manifestacija u Gradu Mostaru, svake godine se osiguravaju finansijska sredstva u godišnjem budžetu Sportskog saveza Grada Mostara u okviru programske zadaće „Sportske manifestacije i turniri – masovni oblici tjelesne kulture“. Odluku o sufinansiranju odnosno odobrenju finansijske podrške sportskim manifestacijama u Gradu Mostaru donosi Upravni odbor Saveza, u skladu s kriterijima za njihovo sufinansiranje a u okviru raspoloživih sredstava rezerviranih za tu namjenu u godišnjem budžetu Sportskog saveza Grada Mostara.

Član 4.

Financijska sredstva kao podršku organizaciji sportskim takmičenjima mogu koristiti samo mostarski sportski klubovi koji su prethodno, u okviru Prijedloga plana i programa rada kluba za tekuću godinu naveli organizaciju sportske manifestacije, te klubovi koji su popunili i predali *Obrazac* za sufinansiranje sportskih manifestacija, minimalno dva mjeseca prije datuma održavanja sportske manifestacije.

Član 5.

Upravni odbor Sportskog saveza Grada Mostara odobrava finansijska sredstva za sufinansiranje sportskih manifestacija s namjenom sufinansiranja organizacijskih troškova određenog takmičenja koji obuhvaćaju protokolarne međunarodne i druge obaveze, sufinansiranje troškova boravka i smještaja službenih predstavnika pripadajuće međunarodne i nacionalne sportske federacije odnosno službenih osoba takmičenja (suci, delegati..), troškove provođenja doping kontrole, troškove objekta i slično.

Član 6.

Zahtjev za odobrenje finansijskih sredstava za Sportske manifestacije u Gradu Mostaru podnose mostarski klubovi, članovi Sportskog saveza Grada Mostara. Zahtjev za sufinansiranje sportskih manifestacija u Gradu Mostaru podnosi se zajedno sa podnošenjem godišnjeg programa i plana rada svakog kluba u roku utvrđenom za njegovo podnošenje u svrhu pripreme godišnjeg programa javnih potreba u sportu na gradskom nivou i godišnjeg Budžeta Sportskog saveza Grada Mostara. Aplikacijski obrasci se mogu naći na web stranici Saveza www.ssgm.ba, te potrebno ih je predati u elektronskoj formi.

Član 7.

Uz zahtjev za odobrenje finansijskih sredstava za sufinansiranje sportskih manifestacija, sportski klub je dužan dostaviti projekt organizacije tog takmičenja sa svim elementima organizacije predmetnog takmičenja, a naročito obuhvaćajući elemente koji su utvrđeni kao mjerila za podršku sportskim manifestacijama u skladu s odredbom člana 8. 9. i 10. ovog Pravilnika te finansijskim pokazateljima organizacije međunarodnog takmičenja u prihodovnoj i rashodovnoj strani.

Član 8.

Sve sportske manifestacije koje se održavaju na području Grada Mostara dijele se na :

- međunarodne sportske manifestacije (minimalno tri države van područja zemalja bivše Jugoslavije)
- regionalne sportske manifestacije (države sa područja zemalja bivše Jugoslavije)
- nacionalne sportske manifestacije (klubovi sa područja BiH)
- lokalne sportske manifestacije (klubovi sa područja Grada Mostara HNK / HNŽ - e)

Član 9.

U odlučivanju o odobravanju finansijskih sredstava za sufinansiranje sportskih manifestacija u Gradu Mostaru Upravni odbor Sportskog saveza Grada Mostara primjenjuje slijedeće kriterije :

- važnost takmičenja za mostarski sport i Bosnu i Hercegovinu
- interes međunarodne i domaće sportske javnosti
- sportska kvaliteta učesnika takmičenja (reprezentativna, klupska)
- pozicija takmičenja u međunarodnim kalendarima.

Član 10.

Međunarodne sportske manifestacije koje se održavaju na području Grada Mostara doprinose međunarodnoj afirmaciji mostarskog sporta u Europi i svijetu, i popularizaciji sporta u našem gradu i državi, te potiču razvoj materijalnih, kadrovskih i drugih uvjeta za unapređenje sporta u Gradu Mostaru. U utvrđivanju iznosa i načina potpore međunarodnim takmičenjima primjenjuju se slijedeća mjerila:

- broj sportaša
- sport, razina takmičenja i dobna kategorija takmičenja
- kriteriji/standardi Olimpijskog komiteta BiH
- marketinške mogućnosti organizatora.

U odlučivanju o sufinansiranju međunarodnih sportskih manifestacija u Gradu Mostaru uvažavajući kriterije i mjerila utvrđene ovim Pravilnikom, uvažava se i položaj određenog

sporta u tablici vrednovanja sportova po grupama utvrđen ocjenom ostvarenih sportskih rezultata, razvijenosti pojedinog sporta te javnog status određenog sporta.

Član 11.

Upravni odbor ima pravo u određenim posebnim okolnostima, pri donošenju odluke o sufinanciranju Sportskih manifestacija u Gradu Mostaru, osim kriterija i mjerila utvrđenih u članovima 8. 9. i 10. ovog Pravilnika, donijeti predmetnu odluku, zasnovanu na ocjeni članova Upravnog odbora o posebnom značaju ili okolnostima koji određuju organizaciju takmičenja čije se sufinanciranje traži.

Član 12.

Međunarodne sportske manifestacije u skladu sa odredbama ovog Pravilnika imaju prioritet u dodjeli finansijskih sredstava, te sportske manifestacije regionalnog karaktera koje ispunjavaju kriterije i mjerila utvrđena u članovima 8. 9. i 10. ovog Pravilnika.

Nacionalne sportske manifestacije spadaju u treći rang po vrijednosti, a u izuzetnim slučajevima može se primjeniti stav 3. člana 10. ovog Pravilnika.

Lokalne sportske manifestacije se podržavaju isključivo osiguranjem sportskih terena za održavanje manifestacije, te priznanjima.

Član 13.

Upravni odbor Sportskog saveza Grada Mostara donijeti će odluku o svakom zahtjevu za sufinanciranje sportske manifestacije pojedinačno, a u okviru raspoloživih sredstava za tu namjenu u godišnjem budžetu Saveza, a slijedom čega će se sastaviti Program podrške Sportskim manifestacija u Gradu Mostaru za svaku kalendarsku godinu, koji predstavlja sastavni dio godišnjeg programa javnih potreba u sportu u Gradu Mostar i godišnjeg budžeta Sportskog saveza Grada Mostara.

Član 14.

Odobrenje sredstava za sufinanciranje sportskih manifestacija nije prepreka da sportski klubovi ostvare i dodatnu stručnu, kadrovsku ili drugu pomoć i podršku Sportskog saveza Grada Mostara uvažavajući mogućnosti Saveza, te potrebu i značaj određenog sportskog takmičenja, a u skladu sa ovim Pravilnikom i odredbama drugih općih akata Sportskog saveza Grada Mostara koji regulišu to područje aktivnosti.

Član 15.

Sportski klub organizator sportske manifestacije kojem su odobrena i doznačena finansijska sredstva za sufinanciranje takmičenja dužan je do kraja kalendarske godine u kojoj je takmičenje održano dostaviti izvještaj o organizaciji tog takmičenja, kao i o utrošku finansijskih sredstava Sportskog saveza Grada Mostara odobrenih za to takmičenje.

Član 16.

Pravilnik stupa na snagu danom donošenja.

Broj: 02/1 – 354/10

Mostar, 22.07. 2010. godine

Predsjednik Upravnog odbora

Hasan Šišić